

萬 有 文 庫

第二集七百種

王 雲 五 主 編

山西先生真文忠公文集

(八)

真 德 秀 撰

商務印書館發行

山西先生真文忠公文集

(八)

真德秀撰

萬有文庫

第二集七百種

總編纂者
王雲五

商務印書館發行

西山先生眞文忠公文集卷四十二

墓表

建昌太守詹侯墓表

故建昌太守嚴陵詹侯將葬。莆陽陳師復爲之銘。旣塋。其孤某復請予表其墓。予曰。銘墓。非古也。銘而又表之。益非古也。然古之欲銘先人功德者。有鼎彝焉。今亡矣。人子思顯其親。將焉託耶。然則雖銘其墓可也。銘而又表之。於義何居。予故曰。益非古也。且侯之墓。師復寔銘之。以銘者之賢。則知得銘者之賢。亡疑也。子之欲顯其親。可亡憾也。而奚以表爲。雖然。予之於侯。有所深敬焉。又有所深惜焉。侯之免倖而選于銓也。銓吏曰。是當復爲縣。夫倖而縣。世之所未嘗有。吏直邀吾賂焉。爾侯獨曰。縣可爲也。賂不可爲也。卒請宣之南陵以去。旣至。廬民如在剡時。歲方饑。振而卹之。尤力也。夫自高而卑。逸而勞。世俗之所甚耻。而不樂焉者也。以其所甚耻。故求所以免其耻者。無不至也。以其所不樂。故凡可以遂其樂者。無不爲也。士之所以失其常心者。其不由此歟。今以侯之事觀之。非所謂卓然異於世俗者乎。蓋不耻人之耻。而惟賂吏之耻者。知義也不避人之所不樂。而惟及物之樂者。好仁也。義與仁。天下之正理。而侯皆有志焉。顧卒不得少究其韞以死。此余之所以敬之。而又惜之也。侯之可書衆矣。予獨表其一節者。以世俗之所難。而銘之所未及也。銘而表之。雖有異乎古。然書其銘之所未及。以勸爲善者。是亦古之遺意也。於是乎書。寶

慶三年十二月甲子建安眞某述

宋故蘄州使君正節李侯墓表

嘉定十四年女眞謀寇邊邊報至蘄守李公戒將吏僚屬豫修戰守備二月甲子虜絕淮而南陷六關圍黃州蹂蘄水縣公命出兵迎敵遇于橫槎橋破之居數日虜擁衆臨沙河經營欲渡又破之明日虜兵大至決隍水焚戰樓皆爲我師拒遏以退又明日移兵要衝爲必渡計我師直前奮擊殺其渠帥一人餘鳥獸散虜雖屢挫然自是謀益巧攻益力未幾遂傳音城下圍之數重虜燔吾所立柵我師爭之殺將卒數十人奪所佩印三月丙戌朔虜攻西門射卻之有據胡床督衆者斃以一矢虜造望樓以窺我我爲疑兵以視之既又使人持書來脅降吾守者公命戮之而還其書越二日虜以攻具進我亦設械禦之長斧巨石當者糜碎煙燄所及蕩爲飛埃夜則壯士擣其營每輒克獲居數日虜攻北門銳甚我師縋而下剿其人毀其梯衝既又迭攻吾四墉皆敗走前後踰再旬卒不能得志於我會黃州失守復鳩其醜類以來我之將士軍民殊死鬪亡一毫退沮意虜技窮垂遁矣不幸援師遷延莫至我之叛將復導賊以登辛丑城陷公與其子士允猶率衆力戰不克死之嗚呼公藐然一儒生爾使其雍容朝著論說古今不過以德人莊士目之一旦憑危堞嬰敵鋒奇變捷出若老於戰陣者援路旣窮竟以身殉其堂堂大節視晉之卞侍中唐之張睢陽無不及焉議者徒知公倉猝所立之絕人而不知其積之有素也開禧中某與公爲僚于閩帥幙府居相鄰游相樂也公嘗慨然見語曰篤信好學守死善道此吾輩八字箴特患立志非堅爾某敬佩其言一日有詒書廟堂以糜捐自誓者公毅然正色曰士大夫此身獨當爲君父死爾可輕以許

人乎。此公伏節死義之心。已定於平昔講學之素矣。及是。喟然謂其僚曰。吾以書生。再任邊壘。行年七十。亦又何求。獨欠一死爾。寇至。當與同僚戮力以守。不濟。則以死繼之。吁。公之素心堅定如此。其視事窮執。迫不得已而死者。可同日語乎。昔者。子路問成人。孔子既以見利思義。見危授命告之矣。至其門人子張。又以見危致命。見得思義。與祭思敬。喪思哀並言之。聖賢平日講論。必先以危難自處。他皆言思。而此獨不言思者。豈非死生之際。惟義是徇。有不待思而決乎。此公所以自斷而弗疑也。公之學主於力行。而充以涵養。平居接物。容色晬穆。飲人以和。見者意消。至其論是非。辨邪正。則凜焉不可回奪。某久從公游。覘之熟矣。嘗竊以謂仁以爲己任。死而後已者。公實有焉。使其見用於朝。居扶顛持危之地。則若汲長孺之不可招麾。蕭望之之折而不撓。皆公所優爲惜也。巨木百圍。不得以棟楹。九廟暴風疾雨。仆之於窮山荒谷之中。自公而言。固得其所。以死而爲世道人材計者。可勝痛哉。世皆言公守蘄以扞賊。有蔽遮舒巢之功。某獨謂公之一死。足以激昂天下臣子之心。使知幸生不足榮。而義死不足畏。帥是以往。人人皆金城也。保全二郡。直其細爾。還觀一時邊鄙之臣。蓋有惜死而逃者矣。鼠雀偷生。迄亦不免含媿入地。猶有餘辜。公雖歿。而義烈昭然。與天地日月相爲亡極。是豈不深可貴耶。始公之議城守也。通判州事秦侯鉅。教授阮君希甫。實與公協同一心。其參與籌畫。則軍事判官趙汝標。知蘄春縣林檠。主簿寧時鳳。其分任守禦。則統領孫中江。士旺。監轄嚴剛中。是數人者。職守不同。人品亦異。然皆生盡力。死盡節。無一首鼠自全者。事方急時。或說寧君出城以追難。寧曰。平時辱太守深知。賊至之日。握手丁寧。勉以忠義。今可負之邪。觀寧君此言。則公之以誠與義感人。使至死不忍背者。其必有道矣。公既闔門蹈難。兄之子士宏。適來省。

貌亦與焉。某時憂居故山。有以其事告者。悲慟久之。顧謂家人曰。天必不絕忠臣之後。已乃聞其長子士昭以先返舍獲全。噫。天道之可憑若是哉。初公爲惠民倉。屬某書其事於石。變亂之餘。公私廬舍俱蕩滅。而此倉巋然獨存。遺民來歸。賴以有濟。公雖死。其惠猶足以救饑殍。活生靈。可不謂仁矣乎。世降俗靡。士大夫以全身保家爲賢。聞公之死。相與訾議者。不可稱數。賴天子仁聖。愍書恤典。所以褒揚者甚寵。然後人知忠義之獲報。而公之道始大光明于時。故龍圖閣學士四明袁公。旣銘其藏。士昭復謁某表其墓。某惟袁公之賢。其言足以信萬世。不待表而見也。獨念平生與公交踰金石。其可默亡一辭。輒敘所聞。與誌銘所未及者。以俟後之君子。嗚呼。公今已矣。士大夫聞風興起。豈必危難而後見哉。立朝事主。以盡忠竭節自期。涖官臨人。去苟且自營之念。則是亦公之心也。詩曰。高山仰止。景行行止。夫高山則仰之。光明正大之行。則必行之。非可以徒仰而已也。有志之士。其亦勉諸。

九峯先生蔡君墓表

君名沉。字仲默。姓蔡氏。西山先生子也。先生嘗特召。堅辭不起。世謂之聘君云。聘君以師事朱文公。而文公顧曰。季通吾老友也。凡性與天道之妙。他弟子不得聞者。必以語季通焉。異篇奧傳。微辭突義。多先令討究。而後親折衷之。故嘗輯其問答之辭。曰翁季錄者。蓋引以自匹也。當是時。西山之名聞天下。君之昆弟。自勝衣起。拜入。則服膺父教。出則從父公游。文公晚年。訓傳諸經略備。獨書未及爲。環珉門下生。求可付者。遂以屬君。洪範之數。學者久失其傳。聘君獨心得之。然未及論著。亦曰。成吾書者。沉也。君旣受父師之託。廩廩焉常若有負。蓋沈潛反復者數十年。然後克就其於書也。攷序文之誤。訂諸儒之說。以發明二

帝三王郡聖賢用心。洪範洛誥秦誓諸篇。往往有先儒所未及者。其於洪範數也。謂體天地之撰者。易之象。紀天地之撰者。範之數。數始於一。奇。象成於二。偶。奇者。數之所以立。偶者。數之所以行。故二四而八卦之象也。三三而九疇之數也。由是八八而又八之。爲四千九十六。而象備矣。九九而又九之。爲六千五百六十一。而數周矣。易更四聖。而象已著。範錫神禹。而數不傳。後之作者。昧象數之源。窒變通之妙。或卽象而爲數。或反數而擬象。洞極有書。潛虛有圖。非無作也。牽合傳會。自然之數益晦焉。嗟夫。天地之所以肇人物之所以生。萬事之所以失得。莫非數也。數之體著於形。數之用妙於理。非窮神知化者。曷足以語此。君於二書。闡幽發微。至於如此。真不媿父師之託哉。慶元初。僞學之論興。文公以黨魁絀。聘君亦遠謫春陵。君徒步數千里。以從九疑之麓。最楚粵窮僻處。山川風物。悲涼慘愴。居者率不能堪。君父子相對。獨以理義自怡說。浩然無湘纍之思。楚囚之泣也。聘君不幸沒貶所。復徒步護柩以歸。有遺之金。而義不可受者。輒謝卻之曰。吾寧隨所止而殯。不忍累其先也。時年僅三十。卽屏去舉子業。一以聖賢爲師。平居仰觀俯察。默坐終晷。瞭然有見於天地之心。萬物之情。反求諸躬。衆理具備。信前聖之言。不予欺也。聘君嘗著律呂書。演八陣圖。皆爲文公所嘆重。然學者鮮闕其微。間以叩君。毫析縷解。使人洒然亡疑。至象緯運行。陰陽嚮背。歷歷如指諸掌。其志以經世綜物自任。而道與時違。遂指山林爲歸宿。卜居九峯。遂與重掩。雖當世名卿物色求訪。將以用君。不屑就也。其文長於論辨。詩早慕太白。晚入陶韋社中。至其吟詠性情。摹寫造化。則又源流文公。感興諸作。非徒以詩自命而已。某之生也後。不及拜聘君床下。而喜觀其書。嘉定中。始見君后山。未幾。過予洪都之郡齋。留止數月。暇則相從質問。得所未悟。後三年。將之潭。詣君以

別戶庭潔幽竹樹茂美如適君平子陵之居伯季聯席衣冠偉然若圖續中見古人物會李敬子公晦墓元思繼至引觴命酌名論迭發難以辨爭竟日散去未知別離之可重也比年退處念一相從於蘆峰巖亭間迄不可得而坐中客如君與公晦父皆不復存然後知一日之會爲千載之訣其亦可悲也夫君之沒實紹定三年五月壬辰年六十有四。是月甲寅葬九峯之東原始君之名若字文公寔命之欲其潛心體道默而成之也。及君長子生公復命之曰模欲其循法履度動與道合也。公之屬君父子者如此。君既克佩師訓模亦進未易量。次子抗以明經擢進士第餘亦嗜學有立。蔡氏自牧堂老人以道術名西山振大之君與二昆又相與闡明之。然皆堙淪弗耦或以爲蔡氏恨予曰是不足恨也。魯之曾氏自歲以後未嘗仕而聖師與其志道統得其傳至西猶羞比管仲是其所得多矣。漢陳仲弓子孫繼隆貴然公慙卿卿慙長位高而名益下君子病之。若君之家學淵源河洛羽翼魯鄒繇祖暨孫先後一轍言學之有本者必推焉此其可貴豈區區人爵比乎。君之言行予友黃君自然狀之模復謂予表其墓予不得辭也。故爲敘其梗概俾刻之石後之君子其尙有考於斯。

墓誌銘

通議大夫寶文閣待制李公墓誌銘

寶文閣待制李公既歿其孤洪宗爲書赴某于西山精舍且請銘某曰僕非能銘者也矧方儼然在衰絰中敢辭洪宗書再至援昔人故事以請甚力某滋不敢當顧念昔者假守溫陵時公與故寶謨閣直學士

楊公炳。今顯謨閣直學士傅公伯成。以法從耆德居里社。年皆垂八十矣。泉人號三大老。歲時讌集。龐眉華髮。奕奕相照。若圖畫中人。某以後進從之游。蓋相予歡甚。洛陽之別。意各黯然。視公色尤若眷眷者。自江西來歸。公數以書問生死。今纔幾時。而遽不起乎。則爲潛焉出涕。而公之言行事蹟。傅公實狀之。某雖不能銘。然賴傅公之文。足以傳信行遠。用不復固辭。蓋公生中原名族。能以文學政事世其家。而清白廉介之節。終其身不少變。世之稱公者。以是而已。至於立朝正色。能言人之所不敢言。則世或未之知也。開禧初。元公自湖北召對。首論建事立政。必廣詢博採。以盡下情。因言朝廷政令之更變者數事。且曰。此特其小者爾。有大此者。苟不謀於衆。而遽欲革焉。人言未同。人心未一。殆恐發之易而收之艱。時韓侂冑用事。久欲弄兵倖勝。以固其權。人情洶懼。鄧友龍輩。以從史傳會据要路。異論者輒斥。帷幄近臣。噤不敢發一語。公新從遠方來。顧抗論如此。識者韙其忠。迨進貳版曹。又以居獻納之地。有大利害。輒盡言於朝。亡所避。旣兵敗于外。鄧友龍以首事生釁。蘇師旦以謀將納賄。皆坐逐。公以爲猶在善地。未足塞責。移書侂冑。乞敷奏顯正其罪。且謂聖上寬仁。若未忍卽加誅戮。亦宜更議遠竄。以解天下之憤。時侂冑雖勉絀二人。以道謗。而意常芘之不衰。故士大夫以公言爲難。權臣雖不懌。然憚公之辭直。弗敢怒也。更化後。迄如公言。嗚呼。公其可謂剛正篤實之士矣。予故表而出之。以示當世云。公諱說。字誠之。系出唐郇王禕。由郇王十一世。至漢宰相濤。仕本朝爲兵部尙書。又四世。至駕部郎中。贈太子少傅諱景山子六人。曰昭。玘。元祐間。爲起居舍人。其季曰瓌。則公之曾祖公也。世居濟之鉅野。建炎中。文肅公避地于泉。因家焉。今爲晉江人。國朝以文治天下。方全盛時。名臣輩出。率由文學選。元祐內相眉山蘇公。爲天下宗師。中丞高郵孫

公亦時偉人。右史游蘇公之門。而悟作文之法。於孫公淵源所。漸至文肅公。宣和間。顯內外制。文名盛天下。建炎中興。雖由忠力位執政。一時大詔令。尙出其手。故李氏號文章家。公逮事文肅公。然尙幼。於諸從兄弟年相若者。已獨嶄然見頭角。太中公旣以疾不仕。望其子甚切。公蚤慧。知奉承太中意。日勤於佔畢。年寢長。益務博覽書史。采摭前文人所造語。及奇字險韻。備作文之料具。日矻矻不休。其爲文。下筆輒千言。賦詩。它人方儲思。已成篇矣。年十三。用文肅公休致恩。補承務郎。旣冠。監潭州南嶽廟。會朝廷始嚴銓試法中之調。興化軍仙遊丞。年雖少。已有能聲。諸臺多諉以事。主管南外睦宗院。時有以南外宗鬻酒之弊。聞于朝。更選任前度友郎趙公不敵爲宗正。革去掊歛積蠹。宗室女有年長未嫁者。悉擇所配。令有所歸。公多所建白。史文惠當軸。陳正獻梁文靖。咸以書薦公可用。將以二令處公。公以親養。不樂遠去。求通判漳州。以歸。漳舊號閩中道院。爲倖者又多以迫爲嫌。事非部使者所諉。漫不可否。公悉心以佐其長。鉅細無所隱。時劇寇沈師旣平。而它盜相挺於鄰壤。公被帥檄爲防備。郡以無警。帥忠定趙公以其事聞。且乞用公知汀州事。雖不果行。而當路由是益知公才。遂擢知黃州。孝廟臨御久。益厲精邊郡。尤不輕畀宰相。初以公姓名聞。上問如何人。宰相以有吏能對。可之。公旣對。首論邊郡數易之弊。乞倣漢制。令郡守兼領武事。遵祖宗久任邊將之法。上意甚悅。將赴郡。趙公時再帥閩。謂公曰。黃邊江賈舶至。困於重征。而舟無所泊。多以風濤壞。盍求所以爲泊舟之所。公至。首訪利病。會歲饑。遂以官錢募飢民。開內澳六百丈。民不告病。而商客以濟。治以最聞。部使者交薦。任滿奏事。乞於冬水落時。凡沿江沙淺處。增置守備。光宗開納詢問甚悉。公奏對亦詳。遂至移刻。玉音諭卿退。條具以聞。公復條上聞者。謂將用矣。會宰相留公丐罷。

待命于郊。公對雖稱旨。無將順上意者。以公知潭州。未上。丁太中公憂。服闋。知袁州。爲政如在黃時。江西號粳稻之鄉。然民無貯蓄。一遇儉歲。常平所儲既尠。又必關白使者。待其符下。每患不及事。公擇用度。凡廚傳苞苴等事。一切不爲。既有餘。則儲米幾二萬斛。名之曰州濟倉。春夏糴貴。則發以糴。秋冬收成。復積之。如常平法。朝廷知公治行。用爲夔路提點刑獄。未幾。除轉運判官。蜀四路惟夔最崎嶇。山峽間。民貧饑。然水耕火耨。官苟無擾。亦廬廬足。公約束郡縣。省追胥。理冤枉。禁苛暴。一切以靜治。人用率服。漕置司。夔子屬郡有鬻鹽之利。歲計取足。羨錢猶多。吏或不良。以羨爲市。公悉以代上供之虛椿。補綱運之隱沒。幾二十萬緡。移荆湖北路。兵燹將啓。調度多屬之王人。而外計寔任轉輸之責。公選用屬吏。鉤考稽隱。計事無乏。會攝總餽。前使者盜用庫錢二萬緡充饋賂。至以買妾將爲欺隱於官。文書未及而死。吏皆懼累。公以其死也。不欲暴其事。密聞於當路。以其緡爲應副其喪事而已。人以公爲長者。召對。除吏部郎。遷大理少卿。尋遷卿。會詔獄辭所連。有當權及時宰所仇者。欲因中傷之。公無所觀望。案上復却弗顧也。卒獲其平。在廷尉三年。每獄上。雖以情法酌其輕重爲當。必白于廟堂曰。有司但知守法。朝廷當從寬典。若有司欲訛法。是恩歸於己。而怨歸於上。朝廷欲盡法而行。則又人無所措手足矣。其言委曲而不激。故多施行。寺修斷例。久而未就。公乞顓命編修官。且立程限。又以例四萬餘。汎然無統。難於徧閱。若徒流罪誤有出入。有司處斷。雖或過差。未至相遠。至于當死而生。生而死。其相去殊絕。請以大辟案分爲十。其七編麗死比。而獲生者。以示好生之仁。其三編附生比。而論死者。以存止殺之意。前此未有以爲言。公白發之。號稱職。未幾。權戶部侍郎。方時多事。調度百出。公盡心於其職。部舊有總轄司。以鉤攷五子司錢物出入之數。

知其虛實。後廢公請復置之。吏率惡其害己。郎官有不快意者。中於言事官。遂以論罷。朝廷知其誣。不半歲授祠祿。再閱月起帥廣西。時江西賊李元勵未平。連湖廣數路皆警。公分遣兵戍。措置寨棚。諭集士丁。据守險要。盜不能犯。其治郡一以寬厚廉靖爲本。而積年逋寇。設爲方略。督責悉擒。連歲大稔。邊徼無事。除集英殿修撰。繼陞寶謨閣待制。且因任焉。公力求出外。遂以敷文閣待制知建寧府。建俗剽悍。輕於殺人。有鬪者。公責旁人諭解其爭。且明長少上下之分。俾知有禮。方楮券稱提之令下。部使者奉行過當。或計物力科買。或責兌券之家。日約以若干錢。或欲盡官帑所蓄。兌於民以昂其賈。公以民旣徧受其害。官亦將空虛。多尼不卽行。或讒諸朝。謂公害稱提之政。然閩中自更幣後。爲政者爭事苛急。而告訐之俗興。編民貿易。小不如法。輒坐黥隸沒入。由是畏楮如毒虺。得之者惟恐推去不速也。自公下車。行其所無事。然後人視楮爲可用。無復前時疑畏之患。要爲有功於稱提者。而朝廷未之知也。因公丐罷。命進職三等奉萬壽祠以歸。旣退居于家。始買地臨河。更宅劣可居。築樓東偏。扁其下曰臞菴。對河爲圃。手植花竹。日徜徉其間。性不飲。客至。賦詩弈碁而已。祠秩滿告老。上命復畀祠者。再嘉定十三年十月八日甲子。以疾卒于正寢。享年七十有七。積階太中大夫。職寶文閣待制。爵隴西縣開國伯。食邑八百戶。致仕。進通議大夫。遣奏聞。贈宣奉大夫。曾祖瑒。故朝請大夫。贈少師。妣仲氏。贈鎮國夫人。孔氏。贈鄆國夫人。祖邴。資政殿學士。左中大夫。累贈太師。謚文肅。妣任氏。贈魯國夫人。考紉。承議郎。累贈太中大夫。妣陳氏。贈碩人公娶陳氏。再曾氏。並贈碩人。子二人。長慶宗。迪功郎。早世。次洪宗。承務郎。前監福州嶺口倉。女五人。進士謝汝嘉。承奉郎。知湖州歸安縣丞。梁挺。迪功郎。前監台州黃巖鹽場。曾子厚。迪功郎。福州左司理參軍。傅齊。進

士諸葛琰其壻也。孫男三人。龜迪功郎。新興化軍莆田縣主簿。集孫壽孫尙幼。洪宗以是年十二月十六日壬申奉公柩歸于南安縣上塘村之原。從治命也。有文藁七十卷。續通鑑長編分類三十八卷。談叢七卷。藏于家。初公以家世文儒。少年勵志。欲由科第進。諸兄弟方以文爭勝。不相下。伯父萬如先生縝獨愛公。授以手所校西漢書曰。此予平日所用心。子姪非好學。不以畀也。公朝夕讀。益從師友學。爲舉子文。三預漕薦。一爲榜首。再試禮部不第。遂棄去。不復爲。而剌以它著撰及吏能。取知諸公。其學問雖不顯名一家。獨謂二程先生發明聖道之傳。蓋漢以來儒者所不及。寔生於黃。遂於黃立祠。且求朱文公先生之文以記之。推原本始。以示學者。趨鄉居官。不爲詭激。而可以惠利者。無不爲。其大者固已大書深刻。其小者若漳之建菴宇。給閑田。以便往來。黃之創飭屋。居戍兵。以省科擾。袁之寬過稅。優行商。以免寇害。在夔在桂。建營叢冢。以葬流尸。築銓館。以待寒士。架輿梁。以利病涉。積羨錢。以振無告。治道路。以便行旅。蠲逋稅。以寬民力。不可殫書。性疏通易直。所至不求官吏短長。部使者有所施爲。可行則行。不可行。亦以書順導之。使知悟。賢者多樂從之。執已見者。間以取怒。守黃日。轉運使者嚴僞錢之禁。公謂私錢與官錢。雜用已久。一旦驟嚴禁。公私折閱多。人情不安。在邊郡爲非便。漕怒。以公爲縱盜鑄。公恬不卹。已而漕竟以此罷。廣西地曠且遠。吏尠奉法。楊公方時將漕。性廉介。不可干以私。而嫉惡太過。發摘多。官吏重足而立。公以臭味之同。相予厚。然意以爲治道去泰甚。遐方僻壤。士大夫一遭按治。至有全家流落。不能歸者。亦當時有縱舍。由是未嘗以小過按吏也。至建寧。卒以與使者議不合而去。蓋其志在於惠養小民。全安下吏而已。利害則不問焉。初文肅公薨。未諡。淳熙中。近臣言及叱苗劉事。孝宗嘉嘆。特令定諡。事下奏常。奉常采。

謚法。應事有功。定謚文敏。公謂建炎叱折兇渠。褒詔具在。叶謀復辟。忠烈嶢然。豈曰應事。既登朝。請改之。遂更用奉常考功之議。易敏以肅。又以文肅公遺藁久未流布。懼歲月逾遠。易於散逸。銀木于黃。朱文公實爲之序。墓隧之碑未立。謁于周益公。公既銘之。而復親爲之書。文肅公雖寓于泉。以其左僻。有意洪饒之居。公買田築室于豫章。俾次子居之。命其堂曰成志。而身歸溫陵奉墳墓。凡子孫所以顯揚先烈。而繼其志者。靡不竭盡其力。可謂能孝矣。家居守儉約。不以一事紊官府。任子恩既官。其子及長孫。遂於諸姪中。擇好學而文者。亢宗奏之。然後官其外孫曾荷孫。文肅公居泉。僅有埭田。歲租千斛。五房共之。至公悉推所當有。以予貧者。宗族及外姻之昏嫁死喪。多隨力賙助之。所以奉養。則泊如也。年踰六十。卽製衣衾。棺斂之具。前五年卜吉壤營壽臧。命之曰樂丘。時造焉。秋九月屬疾。乙卯晨起曳杖。消搖于門。見者謂其良已。後九日子姪輩環侍。命坐。語如平時。諸姪退。甫及門。已溘然而逝。聞者傷惜之。惟李氏自樂靜先生以昌言直道入元祐黨籍。厥后代有顯人。至公上承累世緒業。遂歷清貫。爲天子侍從之臣。斯亦榮矣。然使公平生所立。或少自畔於先訓。雖襲紫傳龜。顯融赫奕。以之銜俗可也。豈昔人所謂不朽者哉。教衰俗圯。士大夫出身名閥。妄自菲薄。以洩辱其先者。爲不少矣。故某於公。重有感也。若是予焉得不銘。銘曰。

維古之人

世德是貴

爰暨未流

以祿相修

抑抑李公

奮于名家

一節初終

如玉不瑕

昔在滄洲

清醇亮直

亦有雲龍

毅然正色

元祐大論

建炎忠勳

奕葉相望

郁乎清芬

公曰艱哉

曷繼前烈

殮菊綴蘭

漱芳濯潔

退然其容

山澤之臞

義激于中

可敵萬夫

噫嗟柄臣	盜弄戈甲	公獨從容	遇其牙蘂	惟恢首疊	惟冀鬻官
可使斯人	善地是安	言雖莫售	聞者增氣	大化既更	迄如公義
逆逆龍鱗	攫之匪難	料虎之頭	厥維孔艱	人謂公榮	簪筆待橐
孰知公心	優繇一壑	容膝之隘	視猶廣居	梅竹之東	所囑者書
蕩節魚符	漢淮嶺蜀	有田一廛	泰然自足	世教日淪	夷祖昭孫
誰知李公	不辱其門	樂哉斯丘	公斯自卜	銘以昭之	過者必肅

宋文林郎誌銘

慶元二年五月某日金華宋君以文林郎廣南西路鹽事司生管官終于廉州官舍是歲十一月某日歸窆于隆興府新建縣龍子岡後三十有三年君之子自適介章泉趙公昌父有謁于建人真某曰先君子之葬也黨論方譁先友大愚呂公子約書來告母遽銘自適不敢違歲月馳驅丘中之木蔭數畝矣而墓道至今無文可刻懼終泯焉亡以詔來者敢請銘某曰僕之生也後不及撰杖屨從先大夫游且樸學無詞華懼不足以有發敢辭自適羸糧逆旅凡三月婁請弗予置且出其書數通其一曰宋某字茂叔生於紹興壬申年十二三已卓然自立爲鄉里先進所知從呂伯共學其論通鑑貫穿不窮伯共大奇之紹熙改元第進士主筠州高安簿豫章帥王謙仲丘宗鄉尤延之皆待以上客宗鄉伯共虜以爲書狀官歸循從事郎掾融州秩滿辟廣西鹽事主管官漕張君量胡元之又待以上客蓋其氣象和平議論堅正明敏足以決事廉勤足以勵俗不幸年四十餘卒官平時於經史皆究極本原尤工詩篇興寄殊高遠嘗次陸務觀韻曰欲求平易多成拙稍涉新奇却未工得句直須參造化此身何必計窮通曾次所蘊可見矣視其

名若氏。則故相益國周公也。其友王山徐斯遠。南城包顯道。又或傳其事。或爲詞以哀之。而徐之言曰。茂叔之材。內介而外通。平居一語不輒發。及其慷慨論天下事。是非可否。無所回隱。雖平主故人。執政柄在顯塗。一事不可君意。必騰書責之。弗置也。至於通練世故。熟識閭里情僞。吏治得失。則雖世之以吏能著稱者。無以過焉。茂叔其可謂有周天下之材矣。某讀已曩然曰。益公之言金石也。雖微徐君之傳。人其有不信者乎。夫傳猶贅也。銘之滋贅也。雖然。自適之志蘆矣。不可以虛辱。則考其世系曰。曾祖裕。贈奉直大夫。祖有。朝奉郎。知郴州。其歿也。東萊呂成公志其墓。考沆。學篤行高。鄉人尊之曰厲齋先生。君之母在郴州。獲異夢焉。既生。有異質。甫年六七歲。見經子。輒成誦。若夙昔。郴州倖長沙。君年十四五。南軒張宣公一見。許其資可以任道。既又執經東萊之門。方是時。四方雋茂。聚于麗澤者。數十百人。君未至。一旦顚然出其列。成公寢疾。獨以任重道遠。屬君及大愚云。其掾融州守貳。不相能。事積弛。官奉兵食。至或經年弗予。君白守。此戶曹責也。則爲分畫措置。凡廩奉。先兵後官。兵先外寨。官先下僚。而后以次徧及燕餽。它費。則以幣餘當之。郡仰鹽利以給歲入。比大虧。君爲爬梳剔治。未幾復其舊。先是。郡官秩滿。多不能歸。君請次第償其逋奉。且帥同僚。助以私錢。不半歲得替。官亡留者。一日。郡卒謀倡亂。其徒羣詬曰。自戶曹來。吾輩妻子始亡饑凍者。若等忍負之乎。治獄細大必躬。戒吏胥。毋得輒拷問。因能書者。聽自書。不能者。許以吏代。而面覈之。片辭不同。輒坐書者。以故人得輸其情。雖重辟。未嘗施一捶也。田主愬其佃不輸租。君命兩造至庭詰之。顧其貌頗相若。密使人盡取主家文書來驗之。則庶弟也。命還本生。而均其產。以漕檄行視。